

LIS PREDICJIS DAL MUINI

di pre Josef Marchet - Udin, 1965

Il lunari cul cjâf in jù

Doman messe e funzion come simpri a Gargagnà di 'Sore. Siere un moment chê puarte, par plasê, Justin.

No sintistu ce fîl di buerisine inglaçade che al sivile dentri? To fi al à taiade la cuardute lassant la puarte in sfese: sul cont de buine creance, no si fâs strassarie nancje là di te, no mo? E culì o sin dome siet o vot tra viei e vielis, che Diu nus vuardi une polmonite...

Ese, mo une robe curiose cun cheste stagjon, che e cjamine a cessecûl? Il mê di Zenâr al jere Avrîl, che sui prâts a cucavin pestelacs e pinsîrs; il mê di Fevrâr al jere Març, cun siet capricis in dì; il mê di Març al è Zenâr cu la nêf simpri parsore il cjâf. Ca si scugnarà voltâ il lunari. Indi ai viodudis robis ledrosis in tancj agns che o soi in chest mont, ma un Unvier denant daûr come chest no sai di visâmi di vêlu viodût. Si capîs che ancje il timp al vûl adatâsi aes usancis de int di cumò...

Bortul Gnepe, che o sin stâts a scuele insiemit sot il mestri Clocjat - Diu di perdoni - al è stât un fantat di sestin, cence fotis, cul cjâf a cjase e i piis par tiere: e cumò che i clopin i zenoi, no si metial a fâ il moscardin cu lis poleçatis che a vegnin a aurî su la fontane? Si viôt che il çurviel i tache a lâ in boldon. Za dîs, mi contave so fradi Gulin, al si è metût a balâ un bolzar cu la More dai Fôrs, là vie di Baduscli: un stombli e une simple, ce cubie induvinade!

Filine la Crauate, che di frutate e lave ator discolce fieste e disdivore, cu la cotule imblecade e il grimâl cun doi chilos di cragne, cumò che e tocje la cincuantine, no la viodêso ce pipine che e pâ? E à scomençât a furnîsi quant che i è muart l'om: a fuarce di siarpis neris, di façolets neris, di veletis neris e di curdelis neris, e semeave un catafalc jessût a spas. E cumò, finît il corot, e à mudât i colôrs, ma no l'aredament. Sô fie che e à cjolt un siôr, e fâs pecjât mortâl a mandai bêçs, par viodile cussì a lâ in mascare dut il timp dal an!

Filip di Sacueste, che fint sui cuarante agns nol à mai sparagnât un carantan, ma se indi cjapave siet indi beveve vot, cumò che so fradi vedran, murint di un colp, lu à metût in piis, al bêf aghe di poç e al mangje patatis bulidis par no spindi bêçs, e al vîf di scroc domandant a cui un spagnolet, a cui un tai di vin, a cui un pugnut di sâl. Une dì o chê altre lu cjataran muart di fan: sot il quarti, par no fruiâ i linçûi dal jet!

E Tite Cunîli, che di frut al vignive a siervî messe ogni dì e dopo al veve tacât a studiâ cui fraris, cumò che al è rivât insom cui carnevâi e al tire la asime tant che il mus di Voladie sù pe rive di Peressat, nol met plui pît in glesie e al zure che al vûl murî cence che il plevan al vegni a onzii i stivâi ...

Chê zuane di mê fie Mariane, che di frute nus à fats çavariâ, me e la mê Mariane, par mandâle a scuele e par fai cjapâ in man il silabari, cumò che e je maridade e mari, no si ese butade su la leterature? O soi stât, la setemane passade, a cjatâle di là de Aghe e le ai viodude che e stave leint une conte di amôr, intant che la sô piçule e craçave intun cjanton.

E alore, ce maraveis che l'Unvier al vegni dopo de Vierte e l'Istât dopo de Sierade! Culì al è lât dut cui piis par aiar, e nol è nuie ce dî se il lunari al va ancje lui cul cjâf in jù. Chel al è il mancul! E cun cheste us doi la buine sere.